
 CONCLUSIO.

De vitae regimine.

Pag. 162. l. 20. *Sensim igitur quaecunque mutationes faciendae sunt.*] Hanc regulam perpetuo in honore & memoria servare debet medicus, & praesertim quando ex apta medendi ratione institutâ, pateat remedia sensim & lente actura, alterantia dicta, in usum necessario vocanda esse. His enim in exhibendis nunquam non devitanda est festinatio, quippe summa cum curâ, diligentiaque ad singularem humorum crasin habendus est respectus, & ad contrariam sensim & quasi furtim deducendus est aeger; nam quemquem suo modulo metiri oportet, & officio suo turpissimè deesset, iste medicus, qui hujusmodi morbidis, nisi cautè & gradatim, medicamenta directò specialia exhibere auderet.

Pag. ead. l. penult. *Commodissima est equitatio.*] Super insigni autem hac medendi ratione, illud porro monendum habeo; per saepe errasse medicos, perpetuam fere per mare per terras peregrinationem aegris, praesertim phthificis, indiscriminatim imperando.

Hujusmodi enim exercitationes eo tantum valent, quo fibris corporis concussis, ita roboretur ejus habitus; vel ut congesta quaedam one-

rosa excutiantur, & expurgentur; vel ut excernenda omnia eum fervent modum, quem ultra, citraque nequit consistere vera sanitas.

Ubicunque igitur acrimonia calida & putris humoribus inhaereat, atque correctioni & emendationi inprimis sese obviam offert, noxiae ut plurimum sunt pleraeque ex propositis hisce equitationibus & exercitationibus, ut ut laudatis; praesertim eae, quae aut corpus fatigent, aut ejus calorem adaugeant. Cum autem dura haec rerum & humorum conditio, prae caeteris omnibus aegris, phthisicos premit, medico perattenta cautio esset, ne hujusmodi morbidis quaelibet data sit occasio, quae, se specie recti deceptos, plus plusque in dies, in immedicabile malum inducat.

[Pag. 163. l. 3. *Verriculis.*] Cum de rebus ipsis a nostro auctore traditis, non de verbis sollicitus fui, sat admodum habeo, si de *verriculo* admoneam tantum, hoc vocabulum apud bonos Latinitatis scriptores nusquam eo in usu fuisse, quo ei hic tributum est. Sensus sane vocem quandam, qualis est *scopula* in *verriculi* locum substituendum postulare videtur. Quibuscunque autem aegris talis adsit infirma valetudo, quâ idoneae exercitationes fieri nequeant, illud insuper scire oportet, quod caeteris succedaneis longe praestantius & tutius remedium aut praesidium in parca semper, ac pro rei ratione nonnunquam curtâ victus copia habendum est.

Pag.

Pag. 163. l. 23. *Aliquid tamen consuetudini dandum est.*] In alimentis enim exhibendis bene perpendendus est ventriculi & primarum viarum status, eaque licet minus efficacia, prae caeteris eligenda sunt, quae iis minime repugnent, exempli gratiâ, si mulier gulae dedita, dapiumque appetens, caenaque desurgere dubiâ gaudens, se iteratis doloris colici paroxysmis obnoxiam reddiderit, non statim hujusmodi aegrotae, acrimoniâ humorum calidâ haud raro & putri simul laboranti; cibis atque potibus maxime refrigerantibus aut succo limonum, vel acidis fortioribus admittis aggredienda est curatio, acriter etenim dolebit ventriculus; sed blandis & insulsis, lacte asinino, & similibus, cum paucis aromate sociatis tractanda est; nec non & aquas Bathonienses pro varia ventriculi constitutione exhibere, ex indubio & incolumi usu erit; denique ex his sensim ad magis refrigerantia progrediendum est. Neutiquam autem haec cautio neglectui est medico, ne novo & insanabili ut plurimum morbo exinde oborto, ipse tanquam magni hujus mali aut forsan ipsius mortis citò futurae opifer, non caecis & vitiosis, ut promiscue & communiter fieri solet, sed perspicacibus & verissimis vicinorum suffragiis damnatus, tota vituperabitur urbe.

F I N I S.

